

Protocol no. 79**Sezzüda da mardi, als 22 october 2013 08.30 – 11.30**

Preschaints: Albert Mayer, Andri Poo, Men Caviezel, Dumeng Jann, Marianne Werro-Lehmann e Marco Fallet (protocol)

Protocol

Il protocol no. 78 da la sezzüda da gövgia, als, 10 october 2013 vain approvà.

701 021 FABRICA
Men Caviezel; reconstrucziun suottet bain Bativ

Il schef da fabrica, Dumeng Jann, preschainta la fatschenda. Il cusglier, Men Caviezel, piglia recusaziun. L'acconsentimaint davart l'uffizi per il svilup dal territori dal Grischun (BAB) ais avantman. In basa da quai e da la proposta da la cumischiun conced'ìl Cussagl il permiss da fabrica cun vusch unanima.

702 021 FABRICA
Regula Trauffer; lobgia nouva fatschada vest a Bügliet

Il termin da publicaziun ais scadü ed i nu sun entradas ingünas protestas. Tuotta documainta ais avantman e sün proposta da la cumischiun da fabrica conced'ìl cussagl, cun vusch unanima, il permiss da fabrica.

703 021 FABRICA
Cumün politic Sent; refacziun e fuormaziun da la piazza da la baselgia San Lurench, sculptura nouva da G. Hohenegger

Il termin da publicaziun ais scadü ed i nu sun entradas ingünas protestas. Tuotta documainta ais avantman e sün proposta da la cumischiun da fabrica conced'ìl cussagl, cun vusch unanima, il permiss da fabrica.

Las lavuors da fabrica gnaran effetuadas dürant las prosmas eivnas.

704 219.319 Contribuziun a la biblioteca da scoula
Biblioteca da Sent / augmaint da la contribuziun annuala

Il capo, A. Mayer, orientescha sur da seis aboccamaint cun duonna Leta Mosca ed Elisabeth Poo, respunsablas pella biblioteca. Daspö si'existenza (32 ons) han las duonnas s'ingaschadas e prestà gronds pensums da lavur, adüna in möd gratuit. A chaschun da la revisiun dal quint annual 2012 davart la società d'util public ais gnü propuonü, cha la lavur dess uossa gnir indemnizada. Quai vuol dir, cha la contribuziun annuala gniss augmantada

da fr. 5'200.00 sün fr. 12'500.00. In quel möd gniss la lavur indemnizada almain per üna part (ca. 300 uras à fr. 20.00, implü fr. 750.00 pell'administraziun e contabilità).

Il Cussagl ais da l'avis, chi vain prestada fich buna e cumpetenta lavur per nossa biblioteca, chi's preschaint'adüna in ün bun stadi actual. Ultra da quai ais quella sporta culturala fich importanta per noss scolars ed abitants.

Cun vusch unanima decid'el d'augmantar la contribuziun e da resguardar quai i'l preventiv 2014. Quist sustegn correspuond'a la pratcha analog als cumüns vaschins.

705 9 FINANZAS ED IMPOSTAS
Preventiv 2014

Il cussagl decida da repassar quel in möd preparatoric, davo cha'l contabel ha survgni da minchün las indicaziuns da mincha dicasteri e miss in net las cifras. Hoz nu vain entrà in fatschenda.

706 810.438 Progets forestals
Proget sanaziun via da god Vallorcha; surdatta da las lavuors d'impressari

L'uffizi da god e privels da la natüra dal Grischun meridiunal, Zuoz vaiva pretais las offertas e tillas evaluadas. Quel surdà uossa la fatschenda al cussagl pella surdatta da las lavuors.

I sun entradas sequaintas offertas missas in uorden:

Impraisa Mario Sarl., Ramosch	fr.	74'193.85	(100.0%)
Bezzola Denoth SA, Scuol	fr.	76'140.00	(102.62%)
Koch, impraisa da fabrica, Ramosch	fr.	77'210.30	(104.07%)
Lazzarini SA, Samedan	fr-	85'428.00	(115.14%)

Il Cussagl decida, cun vusch unanima, da surdar l'incumbenza a la ditte Impraisa Mario Sarl., Ramosch pel predschi d'offerta.

707 217.503 Chasa da scoula
Proget da sanaziun; surdatta da las lavuors da planisaziun da s-chodimaint e ventilaziun

La cumischiun dal proget ha examinà las offertas entradas:

ARGE Gini, Kalberer	fr.	47'998.45 net incl. ipv.	(100 %)
S. Collenberg, San Murezzan	fr.	72'150.35 net incl. ipv.	(150.32%)

Scumpart previs tanter las duos dittas			
Planisaziun Gini, Samedan	fr.	17'781.10	
Kalberer e partenari, Cuaira	fr.	30'217.30	

Il cussagl surdà las lavuors, sün proposta da la cumischiun, a la ditte:

ARGE Gini, Kalberer pel predschi d'offerta / fr. 47'998.45 net incl. ipv

Quel predschi s'inclegia per tuottas etappas chi vessan da gnir realisadas. In oter cas as redüa quel tenor quai.

708 DIVERSAS SCHEFS

Gita tras cumün / concept da tablas

Marianne Werro preschainta üna proposta per l'installaziun da 6 tablas cun plan dal cumün e descripziun d'alchünas chasas a regard la gita tras cumün pels giasts. Cun quellas tablas po gnir pussibilità al giast da far la gita sainza guida – el po leger cuort l'istorgia da 6 chasas chi's ha tschernü.

Tablas da bainvgnü a l'entrada dal cumün

Marianne Werro orientescha sur dal stadi da las trattativas cul Chantun. Da quella vart ais il lö previs (in vicinanza da l'Ospidal a Scuol) gnü refüsà, uschè chi sto gnir examinà ün nouv lö. A regard il text decid'il cussagl pella varianta «**Bainvgnü i'l cumün da cultura!**»

709

ORIENTAZIUNS

Plazza da fermativa da l'auto da Posta / spostamaint dal lö

Davart Gian Janett, manader redschia, da l'auto da Posta ais gnü inoltrada la dumonda da pudair dischlocar a partir dal december 2013 la piazza da fermativa da l'auto da Posta aint in Plaz, causa cha pro'l stabilimaint da la Posta ais quai pac lö chi permetta quai.

Marianne Werro ha eir gnü ün aboccamaint cul manzunà survart ed i füss eir previs da plazzar in vicinanza da la pensiun Plaz ün automat da bigliets. Quel intent bsögna ün permiss da fabrica.

Our da la discussiun result'il seguaint: Perintant vain uossa la situaziun laschada sco ch'ella ais. La fatschena vain tgnüd'in ögl ed examinada in möd plü concret. In quist sen vain orientà in scrit al respunsabel, G. Janett.

Via da velos Ovella – Altfinstermünz

Il Capo, Albert Mayer, orientescha supra il proget previs da realisar uossa davart da la PEB. Ils cuosts restants sun considerabels, dimena fr. 1,615 miu. Da manzunar ais, cha oriundamaing d'eria previs il proget cun cuosts da raduond fr. 5 miu. Uossa as haja müdà la larghezza da la via, uschè cha quels s'han redots ad üna somma da fr. 3,230 miu. Davart dal Chantun as poja quintar cun üna contribuziun da 50%. Ils respunsabels da la PEB prevezzan però da dumandar dafatta per üna contribuziun da 75%. Il cumün da staziunamaint, Val Sot, vess da pajar 20% dals cuosts restants (fr. 323'000.00). Quel ha però declerà d'as vulair participar cun fr. 100'000.00. Il scumpart süls oters cumüns ais previs seguond clav da la PEB, quai chi significhess per nos cumün üna somma da fr. 97'675, la quala stu vess gnir resguardada i'l preventiv dal 2015. I vain uossa spettà sülla decisiun davart dal Chantun, la quala chaschuness ev. üna reducziun da la somma dals cumüns.

Ditta Lazzarini SA / regal dal banc a Sala / termin da surdatta

La ditta suottametta duos termins. Il Cussagl decida per quel da marcurdi, als 6 november 2013 a las 17.00.

Corp da pumpiers

Il cusglier dal dicasteri, Men Caviezel, ais gnü tschernü sco nouv president dal corp da pumpiers Pisoc. Sia plaiv aintr'in vigur a partir da subit. Ils collegas dal cussagl til gratuleschan per quella nomina e til giavüschan plaschair e satisfacziun in sia lezcha.

710

VARIA

Eivna cumpacta «A Sent be Rumantsch»

Il Capo suottametta la dumonda davart dals respunsabels per l'organisaziun, scha'l cumün surpigliess eir quist on ils cuosts pellas fotocopchas e.o.p. Il cussagl decida da surtour quels cuosts.

L'actuar:
Marco Fallet

Il Capo:
Albert Mayer